




Dan Evrope obilježen u Jajcu



**Ispraćena još jedna
generacija maturanata**



**Održan STEP Jajce
2018**

DAN EVROPE OBILJEŽEN U JAJCU



Centralna manifestacija obilježavanja Dana Evrope u BiH održana je u Jajcu u organizaciji Delegacije EU u BiH i EU Info centra. Na Vodopadu Plive upriličena projekcija zastave EU uz taktove „Ode radosti”.

Tema ovogodišnjeg Dana Evrope bila je „2018. evropska godina kulturnog naslijeđa”, a Jajce je odabrano kao grad sa 30 nacionalnih spomenika, te bogatom prirodnom baštinom.

Na manifestaciji u Jajcu predstavljeno je kulturno naslijeđe evropskih zemalja i BiH kroz kulinarska umijeća, a sve je bilo popraćeno prigodnim kulturno umjetničkim programom koji su priredili kako domaći izvođači tako i oni iz cijele BiH, ali i šire.

Panel o kulturnom naslijeđu

U Domu II zasjedanja AVNOJ-a održan je panel o kulturnom naslijeđu Jajca kao dijelu bosanskohercegovačkog i evropskog kulturnog naslijeđa na kojem su govorili turistički radnik Dragan Glavaš i hroničar grada Jajca Tvrtko Zrile.

Kulinarski šou

U velikom kulinarskom šou koji je upriličen u Gradskom parku učestvovalo je devet škola iz BiH, ali i slavni šefovi kuhinje Marija Tolmina Sirijelo iz Italije i Konstantin Tursulet iz Rumunije.

Program je trajao do večernjih sati kada je na Plivinom vodopadu upriličena projekcija zastave EU uz taktove „Ode radosti” u izvođenju „Mostar rok škole”.



JAJAČKIM ULICAMA PRODEFILIRALO 238 MATURANATA



Maturskim defileom 238 učenika završnih razreda jajačkih srednjih škola obilježili su kraj srednjoškolskog školovanja. Srednja škola „Nikola Šop” ove školske godine ispratila je 92 maturanta, a Srednja strukovna škola „Jajce“ 146 učenika završnih razreda.

U svečanom defileu ulicama grada zasjali su u najljepšem svjetlu. Radost njihovog slavlja došli su podijeliti s njima roditelji, prijatelji i poznanici.

Vesela povorka zaustavila se ispred Doma kulture Jajce, gdje je maturante pozdravio Načelnik Općine Jajce Edin Hozan uputivši im čestitke sa željom za uspjeh u životu i dobre ocjene tokom nastavka školovanja.

Tom prilikom, Načelnik Hozan učenicama generacije uručio je uz prigodne poklone i novčani dar Općine Jajce u iznosu od 400,00 KM i uz posebne čestitke zaželio im mnogo uspjeha u ostvarivanju životnih ciljeva.

Učenice generacije



Učenicima generacije osigurana je i općinska stipendiju za prvu godinu studija. Treba istaći, kako su ovoga puta jajačke srednje škole iznjedrile četiri učenice generacije, a to su: Elvedina Julardžija i Lamija Agić (gimnazija), Monika Idžanović (medicinski tehničar) i Samanta Jakešević (hotelijersko-turistički tehničar).



ODRŽAN 5. SAJAM TURIZMA I EKO PROIZVODA STEP- JAJCE 2018.



Jajce je zadnjeg vikenda u maju bilo u znaku održavanja 5. Sajma turizma i eko proizvoda STEP - Jajce 2018. godine.

U prisustvu brojnih gostiju, izlagača i posjetitelja Sajam je zvanično otvorio Ministar privrede SBK Sedžad Milanović. Zaželjevši uspješan i ovogodišnji sajam Ministar Milanović čestitao je Općini Jajce i gradu Jajcu na naporima koje ulažu kako bi ovaj događaj postao prepoznatljiv i po sadržaju, ali i broju izlagača.

-Srednjobosanski kanton nalazi se na trećem mjestu po posjeti turista. Siguran sam da to visoko treće mjesto, nakon Sarajeva i Mostara pripada Jajcu koji u najvećem broju posjećuju turisti. Zato i ovaj Sajam doprinosi promociji turističkih potencijala Jajca, istakao je Milanović.

Ugodan boravak u Jajcu svim prisutnima poželio je načelnik općine Jajce Edin Hozan naglašavajući da je ovaj sajam koristan za širu lokalnu zajednicu.

-Želimo i ove godine, na simboličan način, otvaranjem još jednog turističkog lokaliteta poboljšati našu turističku ponudu. Šetnica na Malom plivskom jezeru od danas će biti mjesto koje će svi rado posjećivati i uživati u prirodnim čarima našeg jezera, istakao je načelnik Hozan.





Izlagače i goste pozdravili su i direktor Agencije za kulturno-povijesnu i prirodnu baštinu i razvoj turističkih potencijala grada Jajca Mijat Saraf, Ivo Šimunović predsjedavajući Općinskog vijeća Jajce i Vlasta Honjek-Golinac zamjenica Gradonačelnika Virovitice.

I ove godine Radio Jajce bio je nositelj akcije izbora najljepše uređenog balkona i najljepšeg dvorišta. U kategoriji najljepše uređen balkon/terasa proglašen je balkon Majre Đulić, dok je u kategoriji najljepše uređena okućnica/dvorište najljepšim proglašeno dvorište Ajle Kilim.

U okviru sajamskih sadržaja održan je okrugli stol „Pružanje usluga u privatnom smještaju“ i upriličeno predavanje prof.dr. Nezira Tanovića i mr. Sejada Hercega na temu „Ekonomija ruralnih područja s posebnim osvrtom na proizvodnju ljekovitog bilja“.

Sajam je održan na otvorenom, u centru grada, između dvije kapije, a okupio je preko 50 proizvođača eko proizvoda iz svih gradova naše zemlje, ali i inostranstva.

Partner ovogodišnjeg Sajma bio je grad Ljubuški. Sajam je održan pod pokroviteljstvom Općine Jajce i u organizaciji Agencije za kulturno-historijsku i prirodnu baštinu i razvoj turističkih potencijala grada Jajca.

Sajmom turizma i eko proizvoda zvanično je otpočela i nova turistička sezona.

PREDSTAVA “SVE SE NEKAKO PREŽIVI, OSIM SMRTI” OTVARA 37. POZORIŠNE/KAZALIŠNE IGRE BIH U JAJCU



Najznačajniji pozorišni kulturni događaj u Bosni i Hercegovini Pozorišne/kazališne igre BiH, 37-te po redu, počinju 1. jula, a ključ grada Jajca ove godine, u devet festivalskih dana, biće u rukama dramaturginje i redateljice Dubravke Zrnčić- Kulenović..

Na Press konferenciji selektor i ovogodišnjih Igara, dramski pisac, dramaturg, teatrolog, profesor Almir Bašović zvanično je objavio rezultate ovogodišnje selekcije Pozorišnih/kazališnih igara BiH, a o Igrama su govorili Edin Hozan načelnik općine Jajce, predsjednik

Vijeća Igara i predsjednik Organizacionog odbora 37. Pozorišnih/kazališnih igara BiH i Smiljka Brtan, direktorica JU Doma kulture Jajce i direktorica 37. Pozorišnih/kazališnih igara Bosne i Hercegovine.

-Za nas su Pozorišne/kazališne igre BiH sigurno događaj broj jedan u toku jedne godine, svakako najvažniji i najznačajniji po svojoj tradiciji i po svemu onome što inače taj događaj znači za kulturu u našem gradu, a i šire, istakao je načelnik općine Jajce Edin Hozan.

Ovogodišnje Pozorišne/kazališne igre održat će se u periodu od 1. do 9. jula, a u takmičarskom dijelu predstaviti će nam sedam predstava koje su prošle selekciju, od 18 koliko ih je bilo u konkurenciji.

Stručni žiri koji će odlučivati o najboljim predstavama predstavljat će: Strajo Krsmanović, Irina Dobnik i Adnan Lugonjić. Žiri publike grada Jajca činit će: Igor Lacić, Ilijana Saraf, Senad Alibegović, Pašaga Hodžić i Amela Kavazbašić.

-Pored kazališnih igara koje će se izvesti u takmičarskom dijelu, tu je i prateći program za koji smo se potrudili da ove godine bude bogat kroz amaterska kazališta koja će izvesti predstave za djecu i monodrame, razne izložbe, promocije knjiga. Veoma je važno naglasiti da će biti upriličen omaž pozorišnom i likovnom kritičaru Vojislavu Vujanoviću koji nas je nažalost napustio, a koji je dao veliki doprinos kazališnim igrama u Jajcu i napisao dvije knjige koje su vezane za Igre.

PROGRAM 37. POZORIŠNIH/KAZALIŠNIH IGARA BIH U JAJCU

01.07.2018. godine (nedjelja)
 19:00 sati – Izložba radova Franje Likara (holi Doma kulture)
 19:30 sati – Ceremonija svečanog otvaranja 37. Pozorišnih/Kazališnih igara BiH u Jajcu
 20:00 sati – Narodno pozorište Sarajevo, **SVE SE NEKAKO PREŽIVI, OSIM SMRTI**, Ljubice Ostojić u režiji Dine Mustafića

02.07.2018. godine (ponedjeljak)
 18:00 sati – Portret Darka Cvijetića, razgovor vodi Almir Bašović
 20:00 sati – Pozorište Prijedor, **SVE O ŽENAMA**, Mire Gavrana u režiji Darka Cvijetića

03.07.2018. godine (utorak)
 15:00 sati – Mali teatar Mostar, predstava za djecu **ABECEDA KNJIŽEVNOSTI**
 20:00 sati – MC TERRA Mostar, monodrama **OTIRAC**, autora glumca Ive Krešića

04.07.2018. godine (srijeda)
 19:00 sati – Promocija knjige **PRIPROJETKE I DRAME**, Artura Šniciera
 20:00 sati – Narodno pozorište Republike Srpske Banjaluka, **SABIRNI CENTAR**, Dušana Kovačevića u režiji Marka Misirače

05.07.2018. godine (četvrtak)
 18:00 sati – Razgovor o časopisu **POZORIŠTE**
 20:00 sati – Kazalište mladih „Korifej“ Nova Bila, **GOSPODA MINISTARKA**, Branislava Nušića u režiji Anete Križanec

06.07.2018. godine (petak)
 19:00 sati – Predstavljanje knjige **DRAME**, A. P. Čehova
 20:00 sati – Sarajevski ratni teatar **SARTR, JEDVANOSIMSOBOAKALOMISTOBO**, Nejre Babić i Aleša Kurta u režiji Aleša Kurta

07.07.2018. godine (subota)
 19:00 sati – Izložba **BEZVREMENSKI TEATARSKI RUKOPIS – SULEJMAN KUPUSOVIĆ**
 19:15 sati – Promocija knjige kolumni Sulejmana Kupusovića **GOSPODO BOSANCI I OSTALI, DEBELO SMO ZAOSTALI**
 20:00 sati – Narodno pozorište Tuzla i Prešernovo gledalište Kranj (Slovenija) **ZRNO SOLI ILI SRETAN ROĐENDAN, MARINA**, Nede Bric u režiji Nede Bric

08.07.2018. godine (nedjelja)
 18:00 sati – **HOMMAGE** Vojislavu Voji Vujanoviću
 20:00 sati – Hrvatsko narodno kazalište Mostar, **PREDSTAVA HAMLETA U SELU MRDUŠA DONJA**, Ive Brešana u režiji Ivana Lea Leme

09.07.2018. godine (ponedjeljak)
 19:00 sati – Ceremonija svečanog zatvaranja Festivala, dodjela nagrada i priznanja
 20:00 sati – U čast nagrađenih, **KONCERT The Great Yugoslav Songbook**/Naša velika pjesmarica, Vesne Pisarović

01.07. - 09.07.2018.
37. POZORIŠNE/KAZALIŠNE IGRE BIH
JAJCE 2018

ORGANIZATOR: J.U. "DOM KULTURE JAJCE" JAJCE
 GENERALNI SPONZOR: OPĆINA JAJCE
 SPONZOR: **OPĆINA JAJCE**
 GENERALNI MEDIJSKI SPONZOR: **BHT1**
 MEDIJSKI SPONZOR: **FTY JAJCE ONLINE** **RADIO JAJCE** **JAJCE PRESS**

Na završnoj večeri igara nastupit će i pjevačica Vesna Pisarović uz talijanski jazz tri, istakla je direktorica JU Doma kulture Jajce i direktorica 37. Pozorišnih/kazališnih igara Bosne i Hercegovine Smiljka Brtan.

Selektor i ovogodišnjih Igara Almir Bašović u proteklom periodu imao je težak zadatak pregledati i ocijeniti brojne pozorišne komade, te izdvojiti najbolje od najboljih.

Ove godine u selekciji se našlo 18 predstava, a nakon što je odgledao sve predstave selektor Bašović odabrao je 7 predstava koje će obilježiti 37. Pozorišne/kazališne igre BiH.

Ove godine u Jajcu moći ćemo gledati predstave čiji redosljed je pre-dložio selektor Igara:

1. Narodno pozorište Sarajevo: Sve se nekako preživi, osim smrti, autorice Ljubice Ostojić i u režiji Dine Mustafiće;
2. Pozorište Prijedor: Sve o ženama, autora Mire Gavrana i u režiji Darka Cvijetića;
3. Bosansko narodno pozorište Zenica: Romeo i Julija, Wiliama Shakespeare i u režiji Selme Spahić;
4. Sarajevski ratni teatar: Jedvanosimsoboakalomistobo, autora Nejre Babić i Aleša Kurta i u režiji Aleša Kurta;
5. NP RS Banja Luka: Sabirni centar, autora Dušana Kovačevića i u režiji Marka Misirače;
6. Narodno pozorište Tuzla: Zrno soli ili sretan rođendan, Marina!, autorice i režiserke Nede Bric;
7. Hrvatsko narodno kazalište Mostar: Hamlet u selu Mrduša Donja, autora Ive Brešana i u režiji Ivana Lea Leme.

IZGRADNJA SISTEMA ODVODNJE OTPADNIH VODA ZA NASELJA NA DESNOJ OBALI RIJEKE VRBAS



Potpisivanjem ugovora između Općine Jajce i preduzeća HERING d.d. te Općine Jajce i preduzeća „Mukić – Komerc“ d.o.o. Jajce počeli su radovi na izgradnji sistema odvodnje otpadnih voda za naselja na desnoj obali rijeke Vrbas.

Dio je ovo projekta „Vodoopskrba i odvodnja otpadnih voda u F BiH – WATSAN F BiH“. Svrha ovog projekta je da se finansiranjem iz kreditnih sredstava EIB-a i vlastitim učešćem općine, osigura implementacija mjera koje će

poboljšati infrastrukturu i usluge kojima se osigurava adekvatna vodoopskrba, odvodnja, prikupljanje i prečišćavanje otpadnih voda na teritoriji općine Jajce.

Radove na izgradnji podsistema Bistrica i Kuprešani, Smionica, Vukičevci, LOT 1, u ukupnoj vrijednosti od 1.960.121,63 KM izvodit će, prema potpisanom Ugovoru, Grupa ponuđača: HERING d.d. Široki Brijeg i BH4 d.o.o. Jajce.

Isti izvođači, u okviru ovog projekta, radiće i na izgradnji podsistema Bulići i Lučina, Bare, LOT 3, a ukupna vrijednost ovog projekta iznosi 1.555.865,24 KM.

Preduzeće „MUKIĆ-KOMERC“ d.o.o. Jajce, prema potpisanom Ugovoru za izvođenje radova „Izgradnja sistema odvodnje otpadnih voda za naselja na desnoj obali rijeke Vrbas“ – LOT 2, u vrijednosti od 2.217.316,61 KM radiće na izgradnji podsistema Donji Podlipci i Doribaba, Gornja Lupnica i Karići

Nadzor nad izvođenjem radova, prema Ugovoru o centralnom nadzoru i tehničkoj pomoći, vršiće kompanija Louis Berger (Francuska) u konzorciju s kompanijom ILF Beretende Ing ZT GmbH (Austrija).

POTPISAN UGOVOR O FORMIRANJU NAMJENSKE KREDITNE LINIJE



Općina Jajce i UniCredit Bank d.d. potpisale su Ugovor o formiranju namjenske kreditne linije u iznosu do 10 miliona KM. Kamatu po odobrenim kreditima korisnicima kredita Općina Jajce subvencionira u iznosu od 3,3% s rokom važenja 24 mjeseca.

Kreditna sredstva namijenjena su za podsticaj zapošljavanja u privrednim subjektima i samostalnim gazdinstvima sa sjedištem na području općine Jajce.

Kreditna sredstva mogu koristiti pravna lica i samostalni obrtnici registrovani za proizvod-

nu, uslužnu i poljoprivrednu djelatnost sa sjedištem na području općine Jajce.

SVJETSKI DAN UPALNIH BOLESTI CRIJEVA OBILJEŽEN OSVJETLJAVANJEM VODOPADA!



Općina Jajce podržala je inicijativu Udruženja oboljelih od Morbus Crohna i ulceroznog kolitisa u Bosni i Hercegovini i osvjetljavanjem vodopada u Jajcu ljubičastom bojom u znak solidarisanja s više od 5 miliona oboljelih u svijetu obilježila Svjetski dan upalnih bolesti crijeva (World IBD Day).

Udruženje oboljelih od Morbus Chrona i ulceroznog colitisa u BiH egzistira i radi na cijeloj teritoriji Bosne i Hercegovine i osvjetljavanjem vodopada u Jajcu željeli su simbolično

podsjetiti na postojanje Bosne i Hercegovine i naših građana u njoj jer u BiH više od 1.450 ljudi boluje od upalnih bolesti crijeva.

PLANINARSKI DOM BOGATIJI ZA JOŠ JEDAN SADRŽAJ

Planinarski dom na Ćusinama bogatiji je za još jedan sadržaj. Uz pomoć Općine Jajce postavljeno je igralište za najmlađe planinare.

-Pošto je PD "Ćusine" udruženje koje posebno forsira rad s najmlađom populacijom, smatramo da je ovo veoma koristan potez. Bili smo domaćini osnovcima iz Kruščice, Bešpelja, Divičana.... Jedno veliko hvala načelniku, istakao je Velid Hrnjić, predsjednik PD "Ćusine".



USPJEŠNO ODRŽANA DESETA 'BICIKLIJADA DOLINOM PLIVE'



Još jednom je PD „Ćusine“ pokazalo da je sposobno organizovati velike i zahtjevne manifestacije. Ovaj put bila je to deseta jubilara „Biciklijada dolinom Plive“ na kojoj je učestvovalo preko 200 biciklista iz više gradova naše zemlje.

Start etape je bio ispred Muzeja AVNOJ-a, odnosno Vodopada u Jajcu, a cilj je bio izvor rijeke Plive. Biciklisti su vozili prelijepom plivskom dolinom, a u mjestima kroz koja su

prolazili pridruživali su im se i ostali biciklisti.

Kao i prethodnih godina cijelu vožnju pratili su članovi Gradskog duhačkog orkestra/Limene glazbe Jajce.



Po dolasku u Pljevu organizovan je zajednički ručak za sve učesnike biciklijade, a nakon toga uručene su diplome i zahvalnice.

Najmlađi učesnici su bili dvogodišnji Mak Pačavar i Nea Zlatarević, dok je najstariji biciklista ove godine bio Fikret Ramić (82) iz Jezera.

Titulu najsimpatičnijih učesnica ponijele su Una Mandić i Mia Gajić iz Šipova, a diploma za najmasovniju familiju pripala je familiji Ljubez. Najmasovnija ekipa bila je iz OŠ „Nemanja Vlatković” iz Šipova.

I ove godine najoriginalniji bicikl vozio je Niko Glamočak. Zahvalnice su dodijeljene Gradskom duhačkom orkestru/Limenoj glazbi Jajce, Rafting klubu „Jajce”, Hotelu „Turist ’98”, OŠ „Vuk Karadžić” iz Jezera, NVO „Bike Tour“ iz Lukavca, te Senadu Plivacu kao jedinom učesniku na triciklu i Rusmiru Žužiću za učešće na svih deset biciklijada.

Zahvalnice su uručene i Općini Jajce i načelniku Edinu Hozanu kao i Opštini Jezero te načelnici Snežani Ružičić za podršku u organizaciji Biciklijade.

Ova sportsko-rekreativna manifestacija ima veliki značaj prije svega zbog uvezivanja Plivske regije, kao i zbog poboljšanja sportskog sadržaja za sve generacije.

JAJČANI UKLONILI GRAFITE MRŽNJE



Članovi Koalicije protiv mržnje "Zajedno" angažovali su se na uklanjanju grafita uvredljivog sadržaja.

Zajedno sa učenicima uklonjeni su grafiti sa OŠ „Berta Kučera“ i trafo stanice u dvorištu gimnazije. Za učenike koji su učestvovali u pronalaženju i uklanjanju grafita obezbijedene su simbolične nagrade.

Aktivnosti su podržane od strane misije OSCE-a u BiH kroz nabavku materijala, alata i nagrada.

BEEPSTER POSJETIO ŠKOLARCE U JAJCU



Ljudima na Zemlji je potrebna energija za svakodnevni život. Koristi se mnogo energije, čak i one koja nam ne treba, iz izvora koji se ne mogu obnoviti, kao što su nafta i ugalj. Fabrike, automobili, toplota našeg doma, većinom nastaju sagorijevanjem ovih vrsta energije. Međutim, svima je poznato da ovih derivata imamo u određenim količinama, te da njihovo sagorijevanje dovodi do najvećeg problema s kojim se suočava Zemlja, a to je globalno zatopljenje. Redovnu nastavu u OŠ "Jajce" Kruščca prekinula je iznenadna posjeta super junaka Beepstera, koji je došao sa druge planete kako bi učenike upozorio na ovaj problem i prenio važnu poruku. "Vaša planeta Zemlja je u velikoj opasnosti" – upozorio ih je Beepster.

Također, Beepster je predstavio i Beepomat, uređaj koji na jednostavan način ilustruje kako neracionalno korištenje energije iz fosilnih goriva dovodi do globalnog zagrijavanja. Osim znanja i savjeta o energijskoj efikasnosti, Beepster je učenicima podijelio i edukativne brošure sa savjetima koje moraju slijediti ukoliko žele postati heroji i spasiti planetu Zemlju. Uz brošure, na poklon im je uručio i satove koji će ih svaki dan podsjećati da je vrijeme da pomognu Zemlji za bolju budućnost svih nas, prvenstveno djece i mladih, na kojima svijet ostaje.



ČIŠĆENJEM MALOG PLIVSKOG JEZERA ZAVRŠEN PROJEKT 'ZAJEDNO ZA ČISTE VODE BIH'

Velikom akcijom čišćenja Malog Plivskog jezera završena je još jedna sezona ekološkog projekta „Zajedno za čiste vode Bosne i Hercegovine“.

Četvrtu godinu zaredom ovim projektom provode se akcije čišćenja voda, a nakon što su ove godine akcije izvedene na Boračkom, Ramskom i Jablaničkom jezeru te rijeci Željeznici, finalna manifestacija čišćenja održana je na Malom Plivskom jezeru gdje se okupilo gotovo 30 ronionaca pod vodstvom Ronilačkog kluba „Bosna“.

Nakon što su izronili velike količine otpada, na konferenciji za medije predstavljeni su rezultati projekta za 2018. godinu.

U akcijama koje su trajale posljednjih mjesec dana, sudjelovalo je gotovo stotinu ronionaca. Ukupno su na pet lokacija izronili 550 vreća krutog otpada odnosno nešto više od 1400 kilograma. Velike količine izronjenog otpada govore o stvarnoj situaciji kakvu su ronionci zatekli na dnu rijeka i jezera te nužnosti nastavka ovakvih akcija čišćenja.



Inicijatori projekta, predstavnici kompanija Henkel i Bingo te Ronilački klub „Bosna“ pohvalili su napore svih onih koji su se uključili u ovaj projekt.

„Ovakvi projekti osvješćuju ljude koliko je bitna briga za okoliš. Ove brojke odnosno količine otpada koje se nalaze na dnu naših rijeka i jezera zaista šokiraju, a to je i cilj ovih eko akcija. Nadam se da ćemo na ovaj način potaknuti odgovorno ponašanje prema okolišu i vodama jer je to ključ zdravlja nas i budućih generacija“, izjavio je Hrvoje Gavrančić, predsjednik Ronilačkog kluba „Bosna“.

Akcija u kojoj su sudjelovali svi građani kupnjom Persil, Silan i Somat proizvoda, trajala je u Bingo prodavnicama krajem prošle godine nakon čega su uslijedile akcije čišćenja. Sada već tradicionalni ekološki projekt dio je kontinuiranih napora kompanije Henkel s ciljem podizanja svijesti o održivom ponašanju.

„Svake se godine jednako iznenadimo informaciji što su sve naši ronionci našli na dnu rijeka i jezera. Baš zato, svake godine ulažemo veliki trud da ostvarimo što bolje rezultate u smislu što većeg angažmana kako bi što više vodenih površina očistili od neželjenog otpada. Rijeke i jezera su naša velika prirodna bogatstva i naša je odgovornost čuvati te resurse za buduće generacije. Hvala našim partnerima, kompanijama Bingo i Eko život, koji nas podržavaju i hvala ronioncima koji svojim radom sve nas čine ponosnima“, izjavio je Latif Hasanbegović, supervizor u Henkelu.

“Dobre stvari ne treba mijenjati, pa tako i naš tradicionalni projekt, njegovu srž. Ono na čemu se može raditi je svakako učestalost aktivnosti, jer uz sve naše napore da kroz prodajna mjesta i čišćenja na lokacijama približimo sam projekt, mišljenja sam da nije dovoljno jedanput u godini sprovoditi ovu akciju. Nije poenta više u društvenoj odgovornosti, niti u čišćenju na što većem broju lokacija. Svjedoci smo nedovoljne brige o okolišu svaki put kada ronionci iz naših voda izvade otpad.

Svi trebamo raditi na sebi, moramo biti svjesni šta činimo prirodi i dobre i pozitivne primjere širiti. Zato smo i mi danas ovdje da sa svim našim partnerima i medijima ukažemo javnosti na ljudski nemar, te da skrenemo pažnju na značaj odgovorne ophodnje prema prirodi”, istakla je Tatjana Paunoski, PR kompanije Bingo.

Da sav otpad, koji su ronionci izronili iz jezera bude prikladno zbrinut, pobrinuo se Eko život. „Želim iskoristiti priliku da ispred Eko života, kao operatera sistema upravljanja ambalažom i ambalažnim otpadom, izrazim posebno zadovoljstvo što smo ponovo okupili istu ekipu pri kreiranju jedne jako dobre ekološke priče. Cilj ove akcije nije samo očistiti naše rijeke i jezera po završetku aktivnosti, već osvijestiti stanovništvo o pogrešnim navikama i ukazati na štetnost otpada za okolinu te istaknuti ljepotu prirode koja nas okružuje. Drago nam je što svojim angažmanom doprinosimo podizanju svijesti o potrebi očuvanja okoliša i čistoći naših rijeka,“ izjavila je Džana Halilović, projekt menadžer Eko života.

Podršku i ovogodišnjoj akciji čišćenja Malog Plivskog jezera pružila je i Općina Jajce.



OŠ „BERTA KUČERA“ ISPRATILA JOŠ JEDNU GENERACIJU MATURANATA



U holu OŠ “Berta Kučera” Jajce svečano je ispraćena 23. poslijeratna generacija osnovaca, a prva koja je školovanje u osnovnoj školi završila po devetogodišnjem planu i programu rada u osnovnom obrazovanju.

“Ovo okupljanje ima za cilj da spomene sve ono što je u ovoj godini i godinama iza nas bilo. Prošle godine smo održali prvi ovakav skup ispraćajući posljednju generaciju učenika koji su završili osnovnu školu po osmogodišnjem nastavnom planu i programu. Od tada do danas trudili smo se da škola, na svih svojih devet lokacija gdje postoji, bude

kvalitetnija, da nastavnici budu kompetentniji, ali i bolje mjesto rada za nastavnike“, istakao je direktor škole Fikret Čančar.

Maturante je pozdravio i Načelnik općine Jajce Edin Hozan poželjeljevši im svijetlu budućnost, sreću i uspjeh u nastavku školovanja i u životu.

Učenica ove generacije je Mešinović Emina koja je u svome kratkom obraćanju istakla važnost borbe svakog pojedinca za bolju budućnost i zahvalila se svojim nastavnicima, roditeljima i školskim kolegama.



OMOGUĆENA STRUČNA PRAKSA ZA UČENIKE HOTELIJERSKO-TURISTIČKE ŠKOLE



Javna ustanova “Agencija za kulturno-povijesnu i prirodnu baštinu i razvoj turističkih potencijala grada Jajca” u suradnji sa Srednjom strukovnom školom “Jajce” omogućila je hotelijersko-turističkim tehničarima obavljanje stručne prakse.

Učenici završenog drugog i trećeg razreda praktično će se usavršavati u sklopu pojedinih segmenata rada ove institucije vezanih za turizam, kulturno-povijesnu baštinu, marketing i promociju, te administrativne poslove.

Pored toga polaznici prakse će u Info centru ili jednom od naplatnih mjesta imati priliku direktnim kontaktom s posjetiteljima i turistima unaprijediti svoje komunikativne sposobnosti. Stručna praksa za 23 učenika će se odvijati u trajanju od mjesec dana. U tom vremenu učenici će izvršiti anketiranje turista i posjetitelja s ciljem dobivanja relevantnih parametara za unaprjeđenje turističke ponude grada Jajca. JU “Agencija” će osigurati topli obrok za sve učenike.

ODRŽANA RADIONICA ‘ODUPIRANJE VRŠNJAČKOM PRITISKU’



Učenici osmih razreda Osnovne škole “Jajce”, područne škole Divični, učestvovali su u radionici izgradnje životnih vještina.

Tema radionice “Odupiranje vršnjačkom pritisku” je aktualna za rani adolescentski uzrast i vještina je koja je skoro svakodnevno potrebna našoj djeci.

Učenici su aktivno sudjelovali, razmjenjivali iskustva i otvoreno razgovarali o situacijama

vršnjačkog pritiska u kojima su se do sada nalazili. Naučili su da vršnjački pritisak može biti i pozitivnog karaktera, kao i strategije kako se uspješno oduprijeti negativnom vršnjačkom pritisku. Radionicu je vodila nastavnica Mirela Humić.

GRADOVI PARTNERI

PIACENZA - Italija <http://www.comune.piacenza.it/>

ALAÇATI – Turska

HALLSBERG – Švedska <http://www.hallsberg.se/>

OTTENSHEIM – Austrija <http://www.ottensheim.ooe.gv.at/system/web/default.aspx>

VIROVITICA – Hrvatska <http://www.virovitica.hr/>

ZENICA – BiH <http://www.zenica.ba/>

TOMISLAVGRAD BiH - <http://www.tomislavgrad.gov.ba>

SZEKSZARD - Mađarska - <http://szekszard.hu/>

KUTNÁ HORA - Češka - <http://www.kutnahora.cz/>

BILTEN OPĆINE JAJCE

Općina Jajce u saradnji s nezavisnim portalom Jajce Online priprema mjesečni Informativni bilten Općine Jajce koji ćete u elektronskoj formi moći prelistati svaki mjesec.

U Biltenu će biti sumirane mjesečne aktivnosti, tekstovi i fotografije koje ste možda preskočili pročitati, a zaslužuju Vašu pažnju.

Također, u Biltenu ćemo najaviti i događaje za naredni mjesec. Pred vama je deveto izdanje Informativnog biltena Općine Jajce.

